
ФАРҒОНАДА МАДАНИЯТ ВА САНЪАТ ХОДИМЛАРИ КУНИ МУНОСАБАТИ БИЛАН КАТТА БАЙРАМ ТАДБИРИ БЎЛИБ ЎТДИ

Бугун Фарғона шаҳридаги Ислон Каримов номидаги вилоят театр-концерт саройида 15 апрель – Маданият ва санъат ходимлари куни муносабати билан тантанали тадбир ташкил этилди. Унда вилоят ҳокимининг ўринбосари Хуршид Аҳмедов иштирок этди ва соҳа вакиллари байрам билан табриклади.

Вилоятимиздан етишиб чиққан Ҳалима Носирова, Наби Раҳимов, Мукаррама Турғунбоева, Таваккал Қодиров, Муҳаммадсоли Юсупов, Маъмуржон Узоқов, Жўрахон Султонов, Расулқори Мамадалиев каби фарғоналик устоз-санъаткорлар ҳақида тайёрланган видеороликлар барчага илиқ хотираларни тақдим этди.

Ҳозирда 4000 нафардан зиёд маданият ва санъат ходимлари фаолият олиб бораётган Фарғонада Ёркиной Ҳотамова, Шафоат Раҳматуллаева, Султонали Маннопов каби Ўзбекистон халқ артистлари, Сайдали Одиловдек таниқли драматургларнинг борлиги фахр билан тилга олинди.

Зотан, вилоятимизда 1 нафар Ўзбекистон халқ хофизини, 4 нафар Ўзбекистон халқ артисти, 9 нафар Ўзбекистонда хизмат кўрсатган артист, 7 нафар Ўзбекистонда хизмат кўрсатган маданият ходими, шунингдек, кўплаб давлат мукофотлари ва медаллари соҳибларининг борлиги, уларнинг сафи кўпайиб бораётгани қувонарли.

Тадбир давомида 8 нафар соҳа вакиллари мамлакатимизда маданият ва санъат соҳасини ривожлантириш, ўзбек миллий маданияти ва санъати нуфузини жаҳон миқёсида ошириш, ёш истеъдод эгаларининг қобилияти ва салоҳиятини рўёбга чиқариш борасидаги фидокорона меҳнатлари учун Маданият вазирлигининг “Маданият ва санъат фидокори” кўкрак нишони билан тақдирланишди.

Вилоятимиздаги мавжуд 152 та маданият муассасаларида ўз касбига меҳр-муҳаббат, садоқат билан хизмат қилиб келаётган бир гуруҳ ходимларга Маданият вазирлиги ҳамда вилоят ҳокимлигининг фахрий ёрлиқлари ва ташаккурномалари, эсдалик совғалари топширилди.

Абдулхай Каримов, Абдужалил Қўқонов каби санъат усталари ва ёш ижодкорлар иштирокидаги концерт дастури, гўзал рақслар байрамга янада кўтаринкилик бағишлади.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2022-04-15 17:43:02